

- 1' Wer stâts jm esel hat die sporen
- 2' Der juckt jm dick biß vff die oren
- 3' Bald zürnen / stat wol zû eym dorn



## Von lychtlich zurnen

- 1 Der narr / den esel allzyt ryt
- 2 Wer vil zürnt / do man nüt vmb gyt
- 3 Vnd vmb sich schnauwet als eyn hunt
- 4 Keyn gütig wort gat vß sym mundt

2' lychtlich *GW5046 GW5047* ] luchtlich *GW5041* zurnen *GW5046 GW5047* ] zyrnen *GW5041* 3 schnauwet *GW5046 GW5047* ] schnawet *GW5041*

5 Keyn bûchstab kan er / dann das R  
 6 Vnd meynt man soll jn vörchten ser  
 7 Das er müg zürnen wann er well  
 8 So spricht eyn yeder gütter gsell  
 9 Wie dût der narr sich so zerryssen  
 10 Vnglück will vns mit narren bschysen  
 11 Er wânt man hab keyn narren vor  
 12 Gesehen / dann hans esels or /  
 13 Der zorn hyndert eyns wysen mût  
 14 Der zornig weyßt nit was er dût /  
 15 Archytas / do jm vnrecht gschach  
 16 Von synem knecht / zû jm er sprach /  
 17 Jch soltt das yetz nit schencken dir  
 18 Wann ich nit merckt eyn zorn jn mir  
 19 Des glychen Plato ouch geschach  
 20 Keyn zorn von Socrates man sach /  
 21 Wân lycht syn zorn jn vngedult  
 22 Zücht / der velt bald jn sünd vnd schuldt /  
 23 Gedult / senfft widerwertikeyt  
 24 Eyn weiche zung bricht herttikeyt  
 25 All tugend / vngedult verschütt  
 26 Wer zornig ist / der bettet nit  
 27 Vor schnellem zorn / dich alzyt hût  
 28 Dann zorn wont jn eyns narren gmût  
 29 Vil ringer wer eyns beren zorn  
 30 Der joch syn jungen hett verlorn  
 31 Dann tulden / das eyn narr dir dût  
 32 Der vff syn narrheyt setzt syn mût  
 33 Der wiß man dût gemach allzyt  
 34 Eyn gâher / billich esel rytt